

CYNGOR SIR YNYS MÔN	
<b>Adroddiad i:</b>	<b>Pwyllgor Gwaith a'r Cyngor</b>
<b>Dyddiad:</b>	<b>Pwyllgor Gwaith 16 Mawrth 2015 Cyngor 14 May 2015</b>
<b>Pwnc:</b>	<b>Rheolau Gweithdrefn Contract Newydd</b>
<b>Aelod(au) Portffolio:</b>	<b>Alwyn Rowlands</b>
<b>Pennaeth Gwasanaeth:</b>	<b>Lynn Ball – Pennaeth Swyddogaeth (Busnes y Cyngor) / Swyddog Monitro</b>
<b>Awdur yr Adroddiad:</b> Rhif Ffôn: E-bost:	<b>Awena Walkden – Cyfreithiwr (Llywodraethu Corfforaethol) Est: 2563 <a href="mailto:apxce@ynysmon.gov.uk">apxce@ynysmon.gov.uk</a></b>
<b>Aelodau Lleol:</b>	<b>D/B</b>

<b>A – Argymhelliad/Argymhellion a Rheswm/Rhesymau</b>
<p><b><u>ARGYMHELLIAD/ION</u></b></p> <p>Mae'r Pwyllgor Gwaith yn argymhell i'r Cyngor llawn bod y Cyngor yn cymeradwyo'r Rheolau Gweithdrefn Contract ("RhGC") newydd (fel y gwelir hwy yn Atodiad 1 yr Adroddiad hwn) ac yn dirprwyo awdurdod i'r Swyddog Monitro i ymgorffori'r RhGC newydd yn y cyfansoddiad.</p> <p><b><u>RHESWM/RHESYMAU</u></b></p> <p>Mae RhGC y Cyngor yn nodi'r fframwaith ar gyfer cynnal ei holl weithgaredd caffael. Pe bai gofynion statudol neu rai cyfreithiol eraill yn mynd y tu hwnt i'r awdurdod a geir yn y RhGC, yna bydd y gofynion hynny'n cael blaenoriaeth dros y RhGC.</p> <p>Mae'r RhGC cyfredol angen eu diweddarau oherwydd :-</p> <ol style="list-style-type: none"> <li>i. Mae'r fersiwn bresennol yn weinyddol drwm ac mae'n creu biwrocratiaeth ddianghenraid ac mae hynny'n ei gwneud yn aneffeithlon.</li> <li>ii. Nid yw bellach yn unol ag arferion gorau ac fe all achosi cymhlethdodau mewn contractau aml-awdurdod, a hefyd i gontractwyr sy'n delio â lliaws o awdurdodau;</li> <li>iii. Mae Grŵp Caffael Gogledd Cymru sy'n cynnwys arbenigwyr contract yn y rhanbarth, wedi cyfarfod ar nifer o achlysuron dros yr ychydig flynyddoedd diwethaf i drafod yr angen am newid yn y RhGC a ddefnyddir gan y rhan fwyaf o awdurdodau. Mae Atodiad 1 wedi ei lunio trwy ddewis rhai o'r pwyntiau allweddol o'r trafodaethau hynny.</li> <li>iv. Mae gwerthoedd y contractau cyfredol wedi eu cynyddu er mwyn awdurdodi swyddogion i gaffael contractau llai yn gyflymach a heb orfod mynd drwy gymaint o weithdrefnau. Fe</li> </ol>

fydd, fodd bynnag, yn ofynnol i swyddogion gadw llwybr archwilio cymesur o'r broses a ddilynwyd a'r rhesymau am eu penderfyniad. Bydd y rhain yn destun archwiliad ac adolygiad mewnol.

- v. I gymryd i ystyriaeth y gofynion deddfwriaethol ar gyfer e-dendro.
- vi. I ddiweddarau rheolau "eithriadau" fel bod awdurdod ymlaen llaw yn cael ei roddi gan Swyddogion ac nid gan y Pwyllgor Gwaith. Pwrpas hyn yw cyflymu'r broses a chysoni'r rheolau gyda'r hyn sy'n digwydd mewn llefydd eraill.

I grynhoi, mae'r canlynol wedi ei gymryd i ystyriaeth wrth greu'r RhGC newydd :-

1. Yr arferion gorau ar hyn o bryd
2. Y gyfraith ar hyn o bryd yng nghyswllt caffael
3. Argymhellion gan swyddogion caffael y Cyngor.

Mae crynodeb ynghlwm yn Atodiad 2 sy'n nodi'r prif newidiadau a fwriedir.

### **GOBLYGIADAU ARIANNOL**

Nid oes unrhyw oblygiadau ariannol i ddiweddarau'r RhGC. Fodd bynnag, bydd y trothwyon ariannol o dan y RhGC yn newid.

### **B – Pa opsiynau eraill wnaethoch chi eu hystyried a beth oedd eich rhesymau dros eu gwrthod ac/neu ddewis yr opsiwn hwn?**

Nid yw cadw pethau fel ag y maent yn opsiwn oherwydd bod angen gwneud newidiadau fel eu bod yn cydymffurfio â'r gyfraith. Fodd bynnag, nid yw'r newidiadau i drothwyon ac awdurdod ar gyfer eithriadau yn ofynion cyfreithiol; maent yn cael eu cynnig er mwyn gwneud y Cyngor yn fwy tebyg i fusnes ac yn fwy effeithlon ac i gefnogi swyddogion caffael i gyflymu'r broses.

### **C – Am ba reswm y mae hwn yn benderfyniad i'r Pwyllgor Gwaith?**

Mae RhGC newydd yn golygu newidiadau cyfansoddiadol na allant gael eu cymeradwyo ond gan y Cyngor llawn yn dilyn eu hystyried gan y Pwyllgor Gwaith.

### **CH – A yw'r penderfyniad hwn yn gyson â'r polisi a gymeradwywyd gan y Cyngor llawn?**

Bydd unrhyw newidiadau i'r RhGC angen cael cymeradwyaeth y Cyngor llawn.

### **D – A yw'r penderfyniad hwn o fewn y gyllideb a gymeradwywyd gan y Cyngor?**

Ydi.

<b>DD – Gyda phwy wnaethoch chi ymgynghori?</b>		<b>Beth oedd eu sylwadau?</b>
1	<b>Prif Weithredwr / Uwch Dim Arweinyddiaeth (UDA)</b> (mandadol)	Yn gefnogol i'r newidiadau
2	<b>Cyllid / Adran 151</b> (mandadol)	Dim sylwadau ar yr adroddiad yma
3	<b>Cyfreithiol / Swyddog Monitro</b> (mandadol)	Cyd awdur yr adroddiad felly ei sylwadau wedi'u cynnwys.
4	<b>Adnoddau Dynol (AD)</b>	
5	<b>Eiddo</b>	
6	<b>Technoleg Gwybodaeth Cyfathrebu (TGCh)</b>	
7	<b>Sgriwtini</b>	
8	<b>Aelodau Lleol</b>	
9	<b>Unrhyw gyrff allanol / arall/eraill</b>	

<b>E – Risgiau ac unrhyw gamau lliniaru (os yn berthnasol)</b>		
1	<b>Economaidd</b>	
2	<b>Gwrthdodi</b>	
3	<b>Trosedd ac Anhrefn</b>	
4	<b>Amgylcheddol</b>	
5	<b>Cydraddoldebau</b>	
6	<b>Cytundebau Canlyniad</b>	
7	<b>Arall</b>	Y manylder gyda gosod contractau bychan wedi'i liniaru drwy :- <ul style="list-style-type: none"> <li>- Ddynodiad arbenigol</li> <li>- Hyfforddiant</li> <li>- Llwybr archwilio</li> <li>- Defnyddio fframwaith contractau</li> <li>- Profion gan Archwilio Mewnol</li> </ul> Adolygu ar ôl 12 mis gydag argymhellion pellach ac / neu adolygiad pellach

<b>F – Atodiadau:</b>
1. Copi o'r Rheolau Gweithdrefn Contract newydd arfaethedig.
2. Crynodeb o welliannau / newidiadau allweddol rhwng y RhGC newydd a'r rhai presennol.

<b>FF - Papurau Cefndir (cysylltwch os gwelwch yn dda gydag awdur yr Adroddiad am unrhyw wybodaeth bellach):</b>
D/B

# ATODIAD / APPENDIX

1

## **Cyfansoddiad: 4.9 Rheolau Gweithdrefn Contract**

### **4.9.1 Cyd-destun**

4.9.1.1 Y rheolau hyn yw Rheolau Gweithdrefn Contract (y "Rheolau") Cyngor Sir Ynys Môn ("y Cyngor") a ysgrifennwyd yn unol â'r Rheoliadau Contractau Cyhoeddus 2006 (2015) ar gyfer caffael gan awdurdodau sy'n contractio.

4.9.1.2 Dim ond y Cyngor llawn all ddiwygio'r Rheolau hyn, ar ôl ystyried unrhyw gyngor a gynigir gan y Pennaeth Swyddogaeth (Busnes y Cyngor) / Swyddog Monitro ac / neu Pennaeth Swyddogaeth (Adnoddau) / Swyddog Adran 151 mewn perthynas ag unrhyw newidiadau arfaethedig

4.9.1.3 Rhaid darllen y Rheolau hyn ar y cyd â Rheolau Gweithdrefn Ariannol y Cyngor (4.8) ac unrhyw ganllawiau neu weithdrefnau caffael a gyhoeddwyd gan y Cyngor ac unrhyw ganllawiau arfer dda sy'n berthnasol i'r math o gaffael.

4.9.1.4 Bydd y Rheolau hyn yn gymwys i'r holl "contractau perthnasol" a wneir gan, neu ar ran, y Cyngor ar gyfer darparu gwaith, cyflenwadau, nwyddau, deunyddiau neu wasanaethau. Mae'r rhain yn cynnwys trefniadau ar gyfer:-

4.9.1.4.1 cyflenwi neu gael gwared ar nwyddau neu ddeunyddiau

4.9.1.4.2 llogi, rhentu neu brydlesu nwyddau neu offer

4.9.1.4.3 cyflawni gwaith

4.9.1.4.4 darparu gwasanaethau yn cynnwys (ond nid yn gyfyngedig i) y rhai sy'n ymwneud â

(a) recriwtio staff

(b) trafodion tir ac eiddo

(c) gwasanaethau ariannol ac ymgynghori

(ch) y cyflenwad o staff a ddarperir gan asiantiaid cyflogaeth, consortia neu gwmnïau eraill

(d) ysgolion, a gynhelir gan y Cyngor, a'u gweithwyr ac eithrio lle cawsant eu diwygio gan y Cynllun Ariannu Teg sy'n berthnasol i ysgolion.

4.9.1.5 Nid yw contractau perthnasol yn cynnwys:-

4.9.1.5.1 contractau cyflogaeth sy'n gwneud unigolyn yn weithiwr uniongyrchol i'r Cyngor

4.9.1.5.2 cytundebau ynglŷn â phrynu, cael gwared ar a throsglwyddo tir (y mae'r Rheolau Gweithdrefn Ariannol yn berthnasol iddynt)

4.9.1.5.3 talu grantiau i drydydd parti (er y bydd angen rhoi ystyriaeth i Rheolau Cymorth Gwladwriaethol)

4.9.1.6 Mae 'Swyddog Cyfrifol' (SC) yn y Rheolau Gweithdrefn Contract hyn yn cynnwys Cyfarwyddwr neu Bennaeth Gwasanaeth neu unrhyw berson arall y mae awdurdod wedi'i ddirprwyo iddo/iddi

4.9.1.7 Mae 'Swyddog Caffael Cymeradwy (SCC)' o fewn y Rheolau hyn yn golygu swyddog sydd ag awdurdod i gaffael gwasanaethau/gwaith ar ran y Cyngor. Mae gan unrhyw swyddog o'r fath gyfrifoldeb parhaus i ddangos i'w Pennaeth Gwasanaeth perthnasol eu bod wedi cael hyfforddiant digonol i'w galluogi i ddeall y rheolau caffael, gan gynnwys, lle mae hynny'n berthnasol, y Rheoladau Contractau Cyhoeddus 2006 (2015). Yn ychwanegol at hyn, bydd yr holl SC yn gyfrifol ar y cyd â'u SCC am sicrhau fod hyfforddiant priodol yn cael ei dderbyn, ei loywi a'i ddiweddarau yn unol â'r cyfrifoldeb a bennir yn y paragraff hwn.

4.9.1.8 Mae'r Rheolau hyn yn nodi gofynion gorfodol. Gall methiant i gydymffurfio â'r Rheolau hyn, Cyfansoddiad y Cyngor neu ofynion cyfreithiol y DU a'r UE gael ei ddwyn at sylw'r Swyddog Monitro, y Rheolwr Archwilio Mewnol neu swyddog perthnasol arall fel y bo'n briodol a gall arwain at gymryd camau disgyblu

4.9.1.9 Yn ychwanegol at hyn, dylai gweithwyr nodi:-

4.9.1.9.1 unrhyw gyfarwyddyd neu weithdrefnau caffael a fabwysiadwyd gan y Cyngor

4.9.1.9.3 unrhyw gyfarwyddyd ar arfer dda sy'n berthnasol i'r math o gaffael

## **4.9.2 Egwyddorion Cyffredinol**

4.9.2.1 **RHAID** i'r holl weithdrefnau caffael:-

4.9.2.1.1 sicrhau gwerth am arian drwy gyflawni'r cyfuniad gorau o bris ac ansawdd

4.9.2.1.2 fod yn gyson â'r safonau uchaf o onestrwydd

4.9.2.1.3 weithredu'n dryloyw

4.9.2.1.4 sicrhau tegwch wrth ddyrannu contractau cyhoeddus

4.9.2.1.5 gydymffurfio â'r holl ofynion cyfreithiol, yn cynnwys egwyddorion Cytuniad yr UE

4.9.2.1.6 sicrhau nad yw ystyriaethau anfasnachol yn dylanwadu ar unrhyw benderfyniadau contractio

4.9.2.1.7 cefnogi holl flaenoriaethau a pholisïau perthnasol y Cyngor

4.9.2.1.8 cydymffurfio â gofynion cyfrinachedd masnachol yn ogystal â gofynion statudol perthnasol, yn cynnwys, ond nid yn gyfyngedig i Ddeddf Rhyddid Gwybodaeth a Diogelu Data

**DS** Bydd y Rheolau hyn yn berthnasol i weithgareddau contractio unrhyw bartneriaeth os mai'r Cyngor yw'r corff atebol oni bai fod y Cyngor yn cytuno fel arall yn benodol

4.9.2.2 Gweithdrefnau ar y Cyd

Gall 4.9.2.2.1 Gall y Cyngor ymddiried y cyfan neu ran o'r weithdrefn dendro neu ddyfynbrisio i awdurdod neu awdurdodau eraill sy'n gweithredu ar y cyd arall, neu gorff tebyg, sydd â gweithdrefnau sy'n cyfateb i'r gweithdrefnau hyn, a ddyluniwyd i sicrhau cydymffurfiaeth gyda'r un amcanion, yn amodol ar y canlynol:-

(a) os bydd y corff yr ymddiriedir y weithdrefn iddo yn gorff sector cyhoeddus, bydd angen cyflwyno rhybudd ymlaen llaw ynglŷn â'r trefniadau i'r Deilydd Portffolio Cyllid a'r Deilydd Portffolio ar gyfer y Gwasanaeth perthnasol a chael cymeradwyaeth ymlaen llaw gan y Pennaeth Swyddogaeth (Adnoddau) / Swyddog Adran 151 neu'r Pennaeth Swyddogaeth (Busnes y Cyngor) / Swyddog Monitro a fyddant yn gyntaf yn ystyried adroddiad yn manylu ar y gweithdrefnau cyffelyb a fabwysiadwyd gan y corff hwnnw

(b) fel arall, bydd y trefniant angen cymeradwyaeth ymlaen llaw gan y Pwyllgor Gwaith, yn dilyn ymgynghori gyda'r Pennaeth Swyddogaeth (Adnoddau) / Adran 151 neu'r Pennaeth Swyddogaeth (Busnes y Cyngor) ac ystyried adroddiad yn manylu ar y gweithdrefnau cyffelyb a fabwysiadwyd gan y corff hwnnw

(c) os yw'r corff yn awdurdod lleol neu'n grŵp o awdurdodau lleol, efallai y bydd y trefniant yn caniatáu i'r broses o dderbyn y tendr neu'r dyfynbris gael ei ddirprwyo i'r corff, os cytunir ar hynny ar yr adeg y gwneir y trefniant

4.9.2.2.2 fel arall, ni ellir dirprwyo derbyn tendr neu ddyfynbris y tu allan i'r Cyngor

4.9.2.2.3 ym MHOB achos rhaid i'r trefniant ganiatáu i'r Cyngor a'i archwilwyr gael mynediad llawn i lwybr archwilio'r penderfyniadau a wnaed

#### 4.9.2.3 Partneriaethau

4.9.2.3.1 Mae Rheol Gweithdrefn Ariannol 4.8.6.4 yn delio â threfniadau partneriaeth ac yn rhoi cyfrifoldeb ar y Pwyllgor Gwaith i'w cymeradwyo. Gall telerau cymeradwyaeth o'r fath gynnwys gweithdrefnau all effeithio ar y modd y bydd caffael yn cael ei weithredu gan neu ar ran y Cyngor neu'r bartneriaeth. Os mai'r bartneriaeth yw'r parti sy'n contractio, rhaid i'r Pwyllgor Gwaith wth gymeradwyo'r trefniadau partneriaeth gymeradwyo hefyd weithdrefnau caffael y bartneriaeth

#### 4.9.3 Eithriadau

4.9.3.1 Ac eithrio lle mae'r Rheoliadau Contractau Cyhoeddus 2006 (2015) yn gymwys, mae gan y Pwyllgor Gwaith yr hawl i hepgor neu amrywio gofynion y Rheolau

4.9.3.2 Yn ogystal, efallai y bydd y Rheolau hyn yn cael eu hepgor neu eu hamrywio os yw'r amgylchiadau yn cael eu hardystio gan y Pennaeth Swyddogaeth (Busnes y Cyngor) / Swyddog Monitro neu'r Pennaeth Swyddogaeth (Adnoddau) / Swyddog Adran 151, neu eu dirprwyon perthnasol, fel rhai sy'n cwrdd ag unrhyw un o'r meini prawf canlynol:-

4.9.3.2.1 ar gyfer gwaith, gwasanaethau a chyflenwadau sydd naill ai â phatent neu sydd o natur mor arbennig nad yw'n bosibl cael prisiau cystadleuol

4.9.3.2.2 ar gyfer cyflenwadau a brynwyd neu ar gyfer eu gwerthu mewn marchnad gyhoeddus neu arwerthiant

4.9.3.2.3 ar gyfer cyflawni gwaith neu wasanaethau, neu brynu cyflenwadau sy'n ymwneud â gwybodaeth neu sgiliau arbenigol neu unigryw

4.9.3.2.4 gyda sefydliad sydd wedi ennill cytundeb ar gyfer cyfnod blaenorol o waith drwy broses gystadleuol a lle bydd y gwaith yn ffurfio rhan o raglen gyfresol ac y nodwyd hynny eisoes

4.9.3.2.5 ar gyfer gwaith, gwasanaethau neu gyflenwadau sydd ond ar gael o un sefydliad

4.9.3.2.6 yn golygu bod cymaint o frys nad yw'n bosibl cydymffurfio â'r Rheolau

4.9.3.2.7 ar gyfer prynu darn o gelf neu eitem ar gyfer amgueddfa neu i gwrdd â gofynion penodol digwyddiad celf neu ddiwylliannol na all fod yn gystadleuol oherwydd natur y gofyniad

4.9.3.2.8 mewn perthynas ag arian grant sy'n gyfyngedig o ran amser gan gorff allanol lle na fydd y cyfyngiadau amser yn caniatáu i broses gystadleuol gael ei chwblhau a lle bo amodau'r grant yn caniatáu hyn

4.9.3.2.9 ar gyfer gwasanaethau gofal cymdeithasol dan y Ddeddf Iechyd a Gofal Cymdeithasol 2012 neu Ddeddf Plant 1989, ar yr amod y bydd tendrau'n cael eu gwahodd neu eu trafod yn unol â Rheol 4.9.4 os yw'r contract yn cael ei roi allan i dendr

#### **4.9.4 Tendro a Dyfynbrisiau**

4.9.4.1 Cyn cynnal unrhyw ymarfer caffael bydd y SC/SCC yn amcangyfrif cost caffael o'r fath, gan gynnwys yr holl gostau atodol ac ategol. Mae'n rhaid iddynt fodloni eu hunain bod yr awdurdod yn bodoli o fewn y gyllideb a gymeradwywyd gan y Cyngor ar gyfer gwariant o'r fath, neu y bydd yn bodoli cyn i'r gwariant gael ei ymrwymo, a bod ganddynt awdurdod dirprwyedig i wario o gyllidebau o'r fath.

4.9.4.2 Cyn cynnal unrhyw ymarfer caffael, bydd y SC/SCC yn ymglyfarwyddo eu hunain gydag unrhyw ymrwymadau contractyddol cyfredol perthnasol ac yn sicrhau y glynir wrthynt drwy gydol y broses.

4.9.4.1.3 Wrth amcangyfrif cost y caffael, bydd y SC/SCC yn cynnwys y gwerth disgwylidig dros gyfnod llawn y Contract, gan gynnwys unrhyw estyniadau a / neu adnewyddu. Os yw tymor llawn y contract yn hysbys, yna gall y Swyddog Cyfrifol geisio arweiniad pellach gan y Gwasanaeth Caffael.

4.9.4.1.4 Mae'r Rheoliadau Contractau Cyhoeddus yn cynnwys y rheolau agregu y dylid eu defnyddio wrth amcangyfrif gwerth y contract

4.9.4.2 Gellir cynnal cystadleuaeth mewn un o ddwy ffordd:

4.9.4.2.1 dogfennau'n cael eu hanfon allan ar ffurf confensiynol naill ai wedi eu printio neu ar CD. Dychweliadau i fod ar yr un ffurf. Mae hyn yn ddelfrydol lle nad yw'r farchnad efallai yn gyfarwydd â cheisiadau ar-lein neu



4.9.4.2.2 bod popeth ar gael ar-lein, sy'n cael ei alw'n aml yn e-dendro. Mae'r Cyngor yn tanysgrifio i'r datrysiad e-dendro. Mae hyn yn arbed amser a chost argraffu, ac mae'n ddelfrydol ar gyfer marchnadoedd TG sydd wedi'u datblygu'n dda

4.9.4.2.3 **RHAID** defnyddio e-dendro ar gyfer pob contract sy'n werth dros £25k

4.9.4.3 Bydd y SC/SCC yn ymgynghori gyda'r Gwasanaeth Caffael cyn tendro ar lefel y Trothwy Contractau Mawr neu uwch

4.9.4.4 Rhaid i'r SC/SCC ymgynghori gyda'r Rheolwr Yswiriant a Risg cyn i unrhyw broses gaffael ddechrau ar gyfer cael cyngor ynglŷn â gwerthoedd yswiriant

4.9.4.5 Bydd y Rheoliadau Contractau Cyhoeddus 2006 (2015) yn berthnasol ar gyfer pob prosiect lle bydd y costau disgwylidig yn uwch na lefelau trothwy'r UE ar yr amser y dechreuir y prosiect ar gyfer caffael y nwyddau, y gwaith neu'r gwasanaethau perthnasol. Bydd raid ymgynghori gyda'r Gwasanaethau Cyfreithiol ym mhob achos o'r fath.

4.9.4.6 Bydd y drefn dendro lawn yn Rheol 4.9.7 yn berthnasol pan fydd y gost ddisgwylidig yn uwch na £30k hyd at drothwy'r UE (**CONTRACTAU MAWR**)

4.9.4.7 Mae'r weithdrefn ddyfynbrisiau yn Rheol 4.9.6 yn berthnasol pan fydd y gost ddisgwylidig yn £10k hyd at £30k (**CONTRACTAU BACH**)

4.9.4.8 Mae'r weithdrefn dyfynbris sengl yn Rheol 4.9.5 yn berthnasol lle mae'r gost ddisgwylidig yn llai na £10,000 (**MÂN GONTRACTAU**)

#### **4.9.5 Gweithdrefn Dyfynbris Sengl Contractau Mân (hyd at £10k)**

4.9.5.1 Bydd y SC/SCC yn sicio a oes trefniant pwrcasu corfforaethol (megis Fframwaith Gwasanaeth Caffael Cenedlaethol) yn cael ei ddefnyddio ar gyfer y gofyniad penodol ac, os oes, bydd archeb yn cael ei gwneud dan y trefniant hwnnw

4.9.5.2 Os nad oes trefniant yn bodoli bydd y SC/SCC yn cael, lle bo hynny'n ymarferol, o leiaf **un** dyfynbris, o restr gymeradwy o gyflenwyr, lle mae rhestr o'r fath yn bodoli, neu o restr gyffredinol o gyflenwyr sydd wedi eu cofrestru

4.9.5.3 Os na fydd rhestr o'r fath yn bodoli, yna bydd y SC/SCC yn asesu pa berson neu gwmni sy'n gymwys ar gyfer y dibenion a fwriadwyd

4.9.5.4 Rhaid cynnal trywydd archwilio er mwyn sicrhau bod y prosesau wedi eu dilyn gyda thystiolaeth o gyfiawnhad gwrthrychol am ddewis person neu gwmni a wahoddir i roi dyfynnu pris

#### **4.9.6 Gweithdrefn Dyfynbrisiau Contractau Bach (£10,000k hyd at £30k)**

4.9.6.1 Bydd y SC/SCC yn sicio a oes trefniant pwrcasu corfforaethol yn cael ei ddefnyddio ar gyfer y gofyniad penodol ac, os oes, bydd archeb yn cael ei gwneud dan y trefniant hwnnw

4.9.6.2 Os nad oes trefniant o'r fath yn ei le bydd y SC/SCC yn gwahodd o leiaf dri dyfynbris ar gyfer y gwaith/gwasanaethau

4.9.6.3 Bydd pob un a wahoddir i roi dyfynbris yn cael yr un mynediad i wybodaeth ynglŷn â'r contract arfaethedig

4.9.6.4 Bydd pob cwmni a wahoddir i roi dyfynbris yn derbyn yr un dyddiad cau ar gyfer dyfynbrisiau ac ni fydd dyfynbrisiau yn cael eu gwerthuso tan ar ôl y dyddiad cau hwnnw

4.9.6.5 Rhaid cadw trywydd archwilio yn dangos pa ddyfynbrisiau a wahoddwyd sut y cawsant eu hasesu a chanlyniad yr ymarfer

4.9.6.6 Ar gyfer unrhyw gontract sy'n werth £25k neu fwy, rhaid rhoi hysbyseb gyhoeddus ar wefan gwerthwchigymru yn [www.gwerthwchigymru.gov.uk](http://www.gwerthwchigymru.gov.uk). Gellir ychwanegu at hyn drwy roi hysbysebion mewn cylchgronau masnachol ac ati yn unol â disgresiwn y Gwasanaeth perthnasol.

#### **4.9.7 Gweithdrefn Tendro Contractau Mawr (£30k hyd at Drothwy'r UE)**

4.9.7.1 Bydd y SC/SCC yn sicio a oes trefniant pwrcasu corfforaethol ar gyfer y gofyniad penodol ac, os oes, bydd archeb yn cael ei gwneud dan y trefniant hwnnw.

4.9.7.2 Os nad oes trefniant o'r fath yn ei le a bod y SC/SCC yn fodlon nad oes unrhyw fudd i weithredwyr economaidd sydd wedi eu lleoli mewn aelod-wladwriaethau, byddant yn gosod hysbyseb gyhoeddus ar wefan GwerthwchiGymru yn [www.gwerthwchigymru.gov.uk](http://www.gwerthwchigymru.gov.uk) neu unrhyw wefan y cafwyd cyfarwyddyd i'w defnyddio dan y Rheoliadau Contractau Cyhoeddus 2006 (2015) er mwyn cydymffurfio â'i rwymedigaethau prynu. Yn ychwanegol at hyn, gellir rhoi hysbyseb/ion mewn cylchgronau masnachol, yn ôl disgresiwn y Gwasanaeth

4.9.7.3 Ym mhob achos arall rhaid cyhoeddi hysbyseb gyhoeddus yn gwahodd datganiadau o ddiddordeb ar gwerthwchigymru gan fod yn ddigon hygyrch hefyd i agor y gystadleuaeth o fewn y farchnad yr UE (i'r graddau y gall y contract, o ystyried holl amgylchiadau'r achos, o bosibl fod o ddiddordeb i gontractwyr mewn aelod-wladwriaethau eraill)

4.9.7.4 Dylai'r hysbyseb nodi natur a phwrpas y contract arfaethedig a, lle y mae'n berthnasol, lle y gellir cael manylion pellach, wahodd tendrau ar gyfer y gwaith a phennu'r drefn ar gyfer cyflwyno tendrau. Rhaid rhoi o leiaf 10 niwrnod gwaith o rybudd

4.9.7.5 Ni fydd unrhyw dendr yn cael ei ystyried onid yw wedi ei gynnwys mewn amlen blaen wedi ei chyfeirio'n amhersonol at y Pennaeth Swyddogaeth (Busnes y Cyngor) / Swyddog Monitro a rhaid ei selio'n ddiogel ac arni'r gair "Tendr" a nodi wedyn y pwnc y mae'r tendr yn ymwneud ag ef, ond ni chaniateir nodi arni unrhyw farc hynod neu farc a fwriadwyd i ddangos pwy yw'r anfonwr a bydd darpar dendrwyr yn cael eu hysbysu o hynny. Ar ôl eu derbyn, bydd amlenni o'r fath yn cael eu cadw heb eu hagor yn yr Adaran Gyfreithiol tan yr amser a bennwyd ar gyfer eu hagor

4.9.7.6 Bydd tendrau'n cael eu hagor fesul un, ym mhresenoldeb dau weithiwr o leiaf, yn cynnwys y Pennaeth Swyddogaeth (Busnes y Cyngor) / Swyddog Monitro neu enwebai a'r SC/SCC, neu berson a enwebwyd. Bydd manylion pob tendr yn cael eu cofnodi ar restr

rhifo mewn trefn. Bydd y tendrau a'r rhestr yn cael eu llofnodi gan y partïon sy'n bresennol ar adeg agor tendrau o'r fath

4.9.7.7 Bydd unrhyw dendr a dderbynnir ar ôl yr amser penodedig fel arfer yn cael eu dychwelyd yn brydlon i'r tendrwr gan y Pennaeth Swyddogaeth (Busnes y Cyngor) / Swyddog Monitro. Fodd bynnag, os bydd y Pennaeth Swyddogaeth (Busnes y Cyngor) / Swyddog Monitro yn fodlon bod tystiolaeth o bostio mewn pryd i'w ddsbarthu erbyn yr amser a nodir yng nghwrs arferol dosbarthu post, a bod y tendrau eraill heb eu hagor, yna fe all ef / hi, yn ôl ei dd/disgresiwn llwyr, ganiatáu'r tendr efallai

4.9.7.8 Lle gwelir tystiolaeth o gamgymeriadau neu anghysonderau clericyddol neu rifyddol ar adeg archwilio'r tendrau a fyddai'n cael effaith ar ffigwr/ffigyrau'r tendr, bydd y Swyddog Cyfrifol yn rhoi gwybod yn ysgrifenedig i'r tendrwr am fanylion gwallau neu anghysonderau o'r fath ac:-

4.9.7.9 mewn achosion lle mae gwallau trawsgrifio neu gyfrifiannu amlwg ar wyneb y ddogfen, rhoddir i'r tendrwr y cyfle i gywiro'r gwallau hynny a;

4.9.7.10 ym mhob achos arall, caiff gyfle i gadarnhau neu dynnu'r cynnig yn ôl yn ysgrifenedig i'r Swyddog SC/SCC. Os bydd y tendrwr yn tynnu'n ôl, yna bydd y tendrwr nesaf yn y drefn gystadleuol (fel y cafodd ei asesu'n unol â'r dull asesu a fabwysiadwyd) yn cael ei archwilio a'i drin yn yr un modd

4.9.7.11 Gellir newid y weithdrefn hon lle mae'r ymarfer yn dilyn canllawiau arfer da cenedlaethol neu gydnabyddedig sy'n pennu trefn arall a bydd pob tendrwr yn cael gwybod ymlaen llaw am y weithdrefn i'w dilyn

4.9.7.12 Dim ond y Pennaeth Swyddogaeth (Cyllid)/Swyddog A151 neu'r Pennaeth Swyddogaeth (Busnes y Cyngor) / Swyddog Monitro all awdurdodi unrhyw eithriad arall i'r drefn hon a hynny ar ôl ystyried adroddiad gan y SC/SCC

4.9.7.13 Er mwyn osgoi amheuaeth ac i sicrhau cysondeb, rhaid i unrhyw hysbyseb y mae angen ei chyhoeddi dan adran 4.9.7 yma gael ei chymeradwyo gan y Tîm Caffael Corfforaethol cyn cael ei chyflwyno i'r farchnad/ei chyhoeddi.

#### **4.9.8 Manyleb o'r Cynnyrch, Gwerthuso a Derbyn**

4.9.8.1 Mewn unrhyw ymarfer caffael rhaid cyflwyno'r wybodaeth ganlynol i'r rheini sy'n dymuno tendro neu ddyfynnu pris:-

4.9.8.1.1 disgrifiad o'r nwyddau sydd eu hangen neu fanylebau o'r gwaith neu'r gwasanaethau sydd eu hangen. Bydd hyn yn cynnwys Telerau ac Amodau'r Cyngor a Chytundeb Prosesu Data, os yw'n berthnasol

4.9.8.1.2 a fydd y cwmnïau'n cael eu hasesu ar sail eu gallu technegol ac os byddant, sut y bydd hynny'n cael ei wneud

4.9.8.1.3 a fydd y cwmnïau'n cael eu hasesu ar eu sefyllfa ariannol ac economaidd ac os byddant, sut y bydd hynny'n cael ei wneud

4.9.8.1.4 a fydd yr asesiad yn un ar sail y pris yn unig neu ar sail y tendr / dyfynbris mwyaf manteisiol yn economaidd. Os mai'r olaf sy'n berthnasol, dylid cyflenwi manylion am unrhyw gynllun sgorio a ddefnyddir ar gyfer y gwerthusiad, yn cynnwys unrhyw is-feini prawf

4.9.8.1.5 rhaid i bob tendr dros y Trothwy Contractau Mawr gael eu gwerthuso ar sail y tendr mwyaf manteisiol yn economaidd

4.9.8.1.6 nid oes unrhyw ymrwymadau ar y Cyngor i dderbyn y tendr isaf nac unrhyw dendr / ddyfynbris

4.9.8.1.7 os derbynnir tendrau amrywiad, ddatganiad i'r perwyl hwnnw, a manylion ynglŷn â'r modd y byddant yn cael eu hasesu

4.9.8.1.8 datganiad bod Deddf Rhyddid Gwybodaeth 2000 yn berthnasol i'r Cyngor a bod unrhyw wybodaeth y mae'r tendrwr yn ystyried ei fod yn gyfrinachol, neu a fyddai'n debygol o ragfarnu eu diddordebau masnachol, yn cael eu nodi ar wahân, gyda rhesymau, yn y tendr neu'r dyfynbris

4.9.8.2 Gall un o weithwyr y Cyngor awdurdodi derbyn dyfynbris ar yr amod bod:-

4.9.8.2.1 ganddo ef / hi yr awdurdod dirprwyedig angenrheidiol i wneud hynny dan y Cynllun Dirprwyo, ynghyd ag awdurdod i ymrwymo cyllideb y Cyngor, a fydd hefyd yn ddigonol ar gyfer y contract arfaethedig a;

4.9.8.2.2 bod y tendr / dyfynbris wedi ei werthuso yn unol â'r wybodaeth a ddarparwyd a naill ai:-

(a) mewn achos lle mae'r contract yn cael ei ddyfarnu ar sail pris, dyfynbris y tendr yw'r pris isaf neu

(b) mewn achos lle mae'r contract yn cael ei ddyfarnu ar sail y tendr neu'r dyfynbris mwyaf manteisiol yn economaidd, bod y cynllun sgorio wedi ei roi i'r tendrwr, a bod y contract i'w ddyfarnu yn unol â'r cynllun sgorio hwnnw

4.9.8.2.3 Bydd y SC/SCC yn hysbysu'r holl dendrwr o ganlyniad yr ymarfer tendro a'r dyddiad y daw'r cyfnod segur i ben (os yn berthnasol)

4.9.8.2.4 Rhaid i'r llythyr penderfyniad dyfarnu i dendrwr aflwyddiannus gynnwys y canlynol:-

(a) y meini prawf dyfarnu

(b) y rheswm dros y penderfyniad, gan gynnwys nodweddion a manteision cymharol y tendrwr llwyddiannus

(c) y sgorau a gafodd y tendrwr aflwyddiannus (gyda dadansoddiad llawn o sgorau yn erbyn pob maen prawf ac is-feini prawf wedi eu cefnogi gyda naratif byr)

(ch) enw'r tendrwr llwyddiannus

(d) datganiad clir ynghylch pryd y bydd y cyfnod segur yn dod i ben (os yn berthnasol)

4.9.8.2.5 Bydd yr holl ymgeiswyr a gafodd eu heithrio rhag cael eu gwahodd i dendro yn cael gwybod bod eu ceisiadau wedi cael eu gwrthod a'r rhesymau am hynny

4.9.8.3 Gellir cymeradwyo amrywiadau i'r weithdrefn dderbyn dan unrhyw un o'r amgylchiadau isod:-

4.9.8.3.1 gwasanaethau a ddarperir yn uniongyrchol i aelodau - lle y gwneir y taliad mewn perthynas â gwasanaethau a ddarperir yn uniongyrchol i aelodau o'r cyhoedd a bod rhaid i'r Cyngor yn ôl y ddeddfwriaeth berthnasol ystyried dymuniadau'r defnyddwyr gwasanaeth

4.9.8.3.2 contractau a wneir fel asiantiaid - lle mae'r tendrwr yn cael ei wahodd fel asiant ar gyfer person neu gorff arall ac sydd â gofynion hollbwysig a nodir yn ysgrifenedig

4.9.8.3.3 hyrwyddo cystadleuaeth – lle mae'r Pennaeth Swyddogaeth (Adnoddau) / Adran 151 neu'r Pennaeth Swyddogaeth (Busnes y Cyngor) / Swyddog Monitro yn cymeradwyo dull arall ar gyfer ymarfer caffael penodol gyda'r nod o hyrwyddo, cynnal neu wella cystadleuaeth yn y farchnad, yn unol ag asesiad y Cyngor

#### **4.9.9 Telerau i'w nodi mewn Tendrau, Dyfynbrisiau a Chontractau**

4.9.9.1 Dylai'r disgrifiad o'r nwyddau, gweithiau neu wasanaethau sydd eu hangen mewn unrhyw wahoddiad i dendro neu ddyfynbris gynnwys y canlynol:-

4.9.9.1.1 Unrhyw safonau perthnasol a gyhoeddwyd gan y Sefydliad Safonau Cenedlaethol neu unrhyw safon gydnabyddedig arall gan gynnwys gofyniad lechyd a Diogelwch a Rheoliadau CDM;

4.9.9.1.2 lle bo'n berthnasol, unrhyw ddarpariaethau yng Nghynllun Iaith y Cyngor

4.9.9.1.3 ar gyfer pob contract neu archeb, bydd angen prawf o yswiriant digonol er boddhad y Pennaeth Swyddogaeth (Adnoddau) Adran 151 gan gynnwys atebolrwydd cyhoeddus, atebolrwydd y cyflogwr ac indemniad proffesiynol os oes angen hynny

4.9.9.1.4 hawl mynediad at ddogfennau perthnasol a chofnodiadau'r contractwr i bwrpasau monitro ac archwilio a gofynion Deddf Diogelu Data 1998

4.9.9.1.5 y gwaith, deunyddiau, materion, gwasanaethau neu bethau i'w cyflwyno, i'w cyflenwi neu eu gwneud (gan gynnwys manylebau technegol)

4.9.9.1.6 y pris sydd i'w dalu gyda datganiad o ddisgownt neu ddiidyniadau eraill

4.9.9.1.7 yr amser neu'r amseroedd ar gyfer cyflawni'r contract

4.9.9.2 ym mhob contract ysgrifenedig dros y trothwy Contract Bach rhaid cynnwys y darpariaethau canlynol yn nhelerau arfaethedig y contract:-

4.9.9.2.1 terfynu'r contract ac adennill unrhyw symiau a dalwyd lle bu tystiolaeth o lwgrwobrwyo neu lygredd

4.9.9.2.2 yn rhoi hawl i'r Cyngor i derfynu rhan neu'r cyfan o'r contract neu i gael darpariaeth arall o gyflenwadau, gwasanaethau a gwaith sydd i'w cyflenwi dan y contract mewn achos o dor-cytundeb ar ran y contractwr neu os bydd y contractwr yn dod yn fethdalwr

4.9.9.2.3 y pris (ac unrhyw fecanwaith ar gyfer penderfynu'r pris, unrhyw bris ychwanegol neu ostyngiadau)

4.9.9.2.4 yn gwahardd y contractwr rhag is-gontractio, neilltuo neu fel arall drosglwyddo'r contract heb ganiatâd ysgrifenedig ymlaen llaw gan y Cyngor ac ar yr amod y bydd y contractwr yn parhau i fod yn atebol i'r Cyngor am unrhyw ran o'r contract a allai gael ei his-gontractio

4.9.9.2.5 cydymffurfiaeth y contractwr â gofynion deddfwriaethol mewn perthynas â:-

(a) iechyd a diogelwch, gan gynnwys sefydlu systemau a gweithdrefnau priodol ar gyfer cyflenwi gwasanaethau a gwaith sydd wedi eu caffael yn cynnwys y Rheoliadau CDM

(b) atal anghydraddoldeb a hyrwyddo cydraddoldeb

(c) y glynir wrth y gofynion o ran hawliau dynol a pherfformiad gweithgarwch swyddogaethol dan y contract (fel pe bai'r contractwr yn gorff cyhoeddus)

(ch) rhyddid gwybodaeth sy'n golygu ei bod yn ofynnol i'r contractwr gydweithio gyda'r Cyngor wrth ymdrin â cheisiadau, gyda'r contractwr yn derbyn y bydd y wybodaeth hon yn agored i'w datgelu a chan ddilyn y gofynion o ran tryloywder lleol ar gontractau a thendrau

(d) diogelu data

(dd) deddfwriaeth trosglwyddo gweithlu lle y bo'n briodol, gan gynnwys codau ymarfer

(e) unrhyw rwymedigaethau cyfreithiol eraill

4.9.9.2.6 cydymffurfio â pholisïau cynaliadwyedd y Cyngor

4.9.9.2.7 indemniadau ar gyfer unrhyw hawliad mewn perthynas ag atebolrwydd cyflogwr neu atebolrwydd cyhoeddus yn deillio o'r contract, gan gynnwys, os yw'n briodol, torri hawliau eiddo deallusol a gofynion yswiriant priodol gan y contractwr

4.9.9.2.8 indemniadau mewn perthynas â hawliadau a wnaed yn erbyn y Cyngor mewn perthynas â gweithgareddau contractwyr a darparu yswiriant boddhaol yn erbyn hawliadau o'r fath

4.9.9.2.9 mewn achosion lle mae gweithgareddau'r contractwr yn rhai o fath y gellir fel arfer eu hyswirio felly, darparu ar gyfer y Cyngor dystiolaeth o yswiriant indemniad boddhaol a ddelir gan y contractwr

4.9.9.2.10 ar gyfer contractau uwchlaw lefel Contractau Mawr sy'n ymwneud â gwneud gwaith neu ddarparu gwasanaethau, darparu diogelwch digonol mewn perthynas â chwblhau gan y contractwr naill ai drwy gadw'n ôl symiau sy'n ddyledus neu rwymedigaeth

i dalu iawndal penodedig neu berfformiad a amnewidiwyd neu (lle mae'n briodol) ddarparu bond perfformiad neu warant rhiant gwmni

4.9.9.2.11 darparu i'r Cyngor ddiogelwch digonol mewn perthynas ag eiddo deallusol gyda diogelwch indemniad lle bo hynny'n briodol

4.9.9.2.12 darparu i'r Cyngor warantau digonol gan gynhyrchwyr cyflenwadau mecanyddol a pheirianeg neu ar gyfer cyflenwadau o gynnyrch eraill lle mae gofynion y Cyngor wedi rhagnodi neu wahardd deunyddiau neu lle mae dyletswydd o sgil a gofal yn briodol i wneuthuriad y cynnyrch mewn contractau ar gyfer prynu cyflenwadau

4.9.9.2.13 lle mae'n briodol, darpariaethau i sicrhau y gweithredir trefniadau gwirio a gwahardd priodol er mwyn sicrhau diogelwch grwpiau sy'n agored i niwed

4.9.9.2.14 hawl y Cyngor i ymgymryd â gweithdrefnau monitro a chydymffurfio

4.9.9.2.15 darparu i'r Cyngor ymrwymadau cyfrinachedd digonol ynghyd ag indemniadau priodol

4.9.9.3 Rhaid i bob contract fydd yn werth mwy na £50,000:-

4.9.9.3.1 gael ei wneud dan sêl y Cyngor a'i ardystio gan o leiaf un o Swyddogion y Cyngor, neu

4.9.9.3.2 gael ei lofnodi gan o leiaf ddau o Swyddogion y Cyngor gydag un o'r ddau Swyddog yn Bennaeth Swyddogaeth (Busnes y Cyngor) / Swyddog Monitro neu ei h/enwebai.

#### **4.9.10 Gwaith Rheoli ar ôl Gosod Contract**

4.9.10.1 Bydd y trefniadau rheoli contract yn cael eu nodi yn y gwahoddiad i dendro a'r contract dilynol. Bydd hyn yn sicrhau y ceir adrodd yn ôl yn amserol am berfformiad, ansawdd, boddhad cwsmer a gwybodaeth reolaethol mewn perthynas â blaenoriaethau ac amcanion y gwasanaeth

4.9.10.2 Ni chaniateir amrywio contract heb ganiatâd y Pennaeth Swyddogaeth (Cyllid) / Swyddog A151 neu'r Pennaeth Swyddogaeth (Busnes y Cyngor) / Swyddog Monitro neu dan ei dirprwyaeth penodol ef neu hi i swyddog arall

4.9.10.3 Ni fydd unrhyw gontract fydd yn fwy na throthwy'r UE yn cael ei ymestyn o ran ei hyd na'i werth oni bai:-

4.9.10.3.1 bod estyniad o'r fath wedi ei gynnwys yn yr Hysbysiad Contract gwreiddiol a bod y dogfennau contract yng nghyswllt estyniad o'r fath yn unol â'r darpariaethau y manylwyd arnynt yn y Rheoliadau Contractau Cyhoeddus a bod opsiynau eraill wedi eu hystyried drwy gyfrwng arfarniad opsiynau a bod y SC/SCC yn fodlon bod yr estyniad yn dangos gwerth am arian a'i fod er budd gorau'r Cyngor yng ngoleuni perfformiad y contractwr.

4.9.10.4 Gall contractau islaw trothwy'r UE gael eu hymestyn yn ôl hyd neu werth os:-

4.9.10.4.1 Na fyddai estyniad o'r fath yn golygu, pe bai wedi ei gynnwys yn y contract gwreiddiol, y byddai'r gwerth cyffredinol wedi mynd uwchlaw trothwy'r UE a bod opsiynau eraill wedi eu hystyried drwy werthusiad opsiynau a bod y Swyddog Cyfrifol yn fodlon bod yr estyniad yn dangos gwerth am arian a'i fod er budd gorau'r Cyngor yng ngoleuni perfformiad y contractwr a bod gwerth cyfunol hwn a chontractau eraill gyda nodweddion tebyg waeth pwy yw'r cyflenwr yn parhau i fod isalw trothwy'r UE.

#### 4.9.11 Amrywiadau

4.9.11.1 Bydd unrhyw amrywiad(au) arfaethedig sydd ar unrhyw adeg yn fwy na 10% o werth y contract yn cael ei asesu/ eu hasesu yn y lle cyntaf i sicrhau nad yw'n torri deddfwriaeth neu bolisi. Rhaid cofnodi'n fanwl y rheswm/rhesymau am yr amrywiad. Ni fydd amrywiadau'n cael eu defnyddio i gelu perfformiad gwael neu broblemau sylfaenol a rhaid i'r effaith ar yr amserlenni gwreiddiol, yr hyn y dylid ei gyflawni a gwerth am arian ffurfio rhan o'r asesiad. Os yw'r effeithiau'n sylweddol, neu dros 10% o werth y contract, rhaid ymgynghori gyda'r SC perthnasol ynghyd ag unrhyw gydranddeiliaid a rhaid mofyn cyngor y Gwasanaeth Caffael.



ATODIAD / APPENDIX  
2

## **CRYNODEB O'R NEWIDIADAU ARFAETHEDIG I'R RHEOLAU GWEITHDREFN CONTRACTAU**

1. Rydym wedi ceisio cadw'r diwyg fel y mae gydag ond ychydig o fân-newidiadau i'r dyluniad er mwyn sicrhau cysondeb gyda fformatau a ddefnyddir gan Gynghorau eraill. Mae hyn er mwyn sicrhau fod modd i'r rheiny sy'n dibynnu ar y Rheolau hyn yn eu gwaith o ddydd i ddydd addasu i'r model newydd hwn yn rhwydd. Y bwriad hefyd yw helpu darparwyr, yn arbennig yn Ynys Môn a Gogledd, i gymharu'r trefniadau ym mhob Cyngor. Yn ein barn ni, mae hyn yn symleiddio'r broses ar eu cyfer ac yn annog ac yn cefnogi mwy o fusnesau lleol i dendro neu i gyflwyno dyfynbrisiau am waith a gwasanaethau.
2. Mae'r Rheolau yn awr yn cynnwys gofyniad newydd i Swyddogion siccio a oes trefniant mewnol neu gydnabyddedig eisoes yn bodoli. Mae hyn er mwyn annog y defnydd o fframweithiau, gan gynnwys unrhyw gonsortiw m prynu lleol ac i gefnogi fframweithiau cydweithio. Fe'u bwriedir i arbed amser ac arian a gallant annog defnyddio cyflenwyr lleol a gânt eu nodi mewn unrhyw fframwaith perthnasol.
3. Mae gwerthoedd y contractau wedi cael eu newid fel a ganlyn:-
  - **£1 → £10,000 (Mân Contractau)**

Mae'n caniatáu i'r Swyddog Cyfrifol asesu cyflenwyr cymwys a gofyn am o leiaf un dyfynbris ysgrifenedig. Awgrymir y dylid codi hyn o'r trothwy cyfredol o £3,000, er mwyn caniatáu proses gyflymach, llyfnach a llai biwrocraidd. Fodd bynnag, mae yna 'quid pro quo'. Mae gofyniad penodol (sydd eisoes ymhlyg) i'r Swyddog Cyfrifol gadw trywydd archwilio llawn ar ffeil i gyfiawnhau'r penderfyniad a wnaed. Mae egwyddorion cyffredinol caffael, fel y darperir ar eu cyfer yn y Rheolau, wedi cael eu dyfeisio er mwyn sicrhau tryloywder, dyrannu gwaith yn deg a sicrhau gwerth am arian i'r Cyngor.
  - **£10,000 → £30,000 (Contractau Bychan)**

Yn yr achos hwn, rhaid i'r Swyddog Cyfrifol gael tri dyfynbris ysgrifenedig o hyd. Mae'r gwerth a awgrymir yn parhau i fod yn £30,000.
  - **£30,000 hyd at Drothwy'r UE (Contractau Mawr)**

Mae angen defnyddio'r weithdrefn dendro llawn. Nid yw hyn wedi newid ar wahân i'r ffaith bod y trothwy wedi gostwng o £30,000 i £25,000. Fodd bynnag, mae gofyniad cyfreithiol newydd yn awr i'r Cyngor ystyried unrhyw ddiddordeb traws-ffiniol a allai fod yn berthnasol i'r contract penodol. Os oes diddordeb o'r fath yn debygol, yna mae angen i unrhyw hysbyseb ymestyn i'r farchnad Ewropeaidd. Os yw'n debygol na fydd diddordeb o'r fath, yna bydd angen hysbyseb genedlaethol.
4. Mae gofyniad newydd i ddefnyddio e-dendro ar gyfer yr holl achosion caffael sy'n uwch na throthwy'r UE. Mae hyn wedi cael ei newid er mwyn adlewyrchu'r newidiadau diweddar yn y ddeddfwriaeth.
5. Ar hyn o bryd, rhaid cael awdurdod i ddefnyddio e-dendro ar gyfer achosion caffael sy'n is na throthwy'r UE. Bellach, mae'n fater i'r Swyddog Cyfrifol benderfynu arno yn unol â'i ddisgresiwn.

6. Mae'r eithriadau yn y rheolau wedi newid hefyd, oherwydd daw awdurdod ymlaen llaw (fe gynnigir) gan Swyddogion ac nid y Pwyllgor Gwaith. Fodd bynnag, bydd rhaid cael cymeradwyaeth y Pwyllgor Gwaith (sef y Pwyllgor Gwaith neu'r Aelod Portffolio) ar gyfer unrhyw beth sydd y tu allan i'r eithriadau. Bwriad hyn yw cyflymu'r broses o wneud a gweithredu penderfyniad ac i wneud i ffwrdd â'r oedi sy'n gysylltiedig â gofyn am benderfyniad gan y Pwyllgor Gwaith. Bydd gan y Swyddogion y dewis o hyd o ofyn am benderfyniad gan y Pwyllgor Gwaith os yw'r mater yn un cynhennus. Bydd rhaid cael penderfyniad y Pwyllgor Gwaith o hyd os oes angen cyllideb.
7. Mae'r manylebau o ran allbwn a'r telerau i'w pennu wedi newid i gynnwys gofynion deddfwriaethol perthnasol megis defnyddio'r Cytundeb Prosesu Data a'r Cynllun Iaith Gymraeg.
8. Mae estyniad hefyd i'r gofyniad i gynnwys meini prawf ac is-feini prawf asesu ynghyd â rheolau o ran dyfarnu contractau a fydd yn sicrhau cydymffurfiaeth gyda deddfwriaeth yr UE.
9. Mae rhai newidiadau i'r gofynion ar ôl gosod y contract megis rheolau amrywio/ymestyn a fydd yn mynd gam ymhellach i sicrhau cydymffurfiaeth gyda rheolau'r UE.